

西湖志

第一函
第七冊

西湖志卷之十五

祠宇二

北山路

關帝廟

在亭子灣

錢塘縣志廟建於萬曆二十六年歲

久圯

國朝雍正九年總督

臣

李衛拓其地重建并構校射亭

閱試文武員弁騎射於此

興化李公祠

在錢塘門外響水閘

錢塘縣志公姓李名思敬

揚州興化人初令永豐有善政權北關清惠愛商

不奉詔增稅第清漏匿而課常足及守枯蒼罷采
鑄嚴保甲建麗譙興文學諸所創舉皆可不朽身
歿之日杭人謳思不已呈請崇祀仍肖像西湖以
當峴山之碑云

國朝康熙年間重建額曰興化李公祠

廣惠廟

在錢塘門外霍山坊

成化杭州府志

按宋朝會要神

姓張名渤血食廣德軍之祠山康定元年始封靈
濟王崇寧三年賜廟額曰廣惠累封至正昭顯威
德聖烈王寶祐丁巳改封真君凡再加曰正佑聖

烈昭德昌福祠創於乾道庚寅越二十有五年紹

熙甲寅始成

趙師白建廣惠廟記霍山廟者廣德張王之別祠也王以休功顯德敷祐

生民綿歷數千餘載歷代罔不優禮褒崇暨入國朝慶曆追錫之命增加王號極其榮美粵自開跡祠山肇興廟食邦人兢悚以供祀事凡雨暘疵癘之災寇攘水火之患有禱於王疾於響答奇驗異應灼灼動人之聞見球弱拯危轉禍爲福載諸傳記不可殫述光靈之迹旁加廣被於是離宮行廟金碧丹雘連城跨郡岌堯相望焉仰惟帝城四方之極百神受職是翼是衛矧王之神游所止密拱京甸眾大之區并蒙祉福顧獨未有揭虔妥靈之地不其闕與乾道庚寅始卜地於霍山裒金鳩工營建棟宇規模位置煥然鼎新奉神之物無一不備蓋以便都人之敬而格明神之休廟成於紹熙甲寅正月二日爲費錢十萬而判院張宗况助施獨多焉師白兼掌諸祠嘉其成績因考其顛末而

刻之 既有旨令修內司別爲祠於金地山以便祈

禱然都人士女競趨霍山不以一關爲憚也景定

二年洪安撫燾咸淳四年潛安撫說友前後葺治

愈加嚴整云錢塘縣志歲以二月八日傾城士女

駢集相傳神卽祠山張大帝是日其誕辰也

靈衛廟

在錢塘門外
俗稱金祝廟

咸淳臨安志建炎三年十二

月完顏宗弼犯境守臣康允之退保赭山錢塘縣

令朱蹕率民兵逆戰傷甚猶叱左右負以擊賊已

丑遂遇害時尉曹十將金勝祝威亦以力戰歿鄉

民瘞二人於錢塘門外因立祠曰金祝二太尉廟

鄭子文金祝二太尉廟記太尉金勝祝威同爲錢塘尉曹總目建炎三年己酉臘月金人侵杭州權守康允之拉州民避寇赭山城無禦備有錢塘令苕溪朱蹕鳩鄉丁僅二千趨餘杭邀擊其前隊民非素練耳目不熟鉦職令遂陷陣而歿兩太尉集凋兵還據葛嶺編竹覆泥爲塗以禦敵越翌日敵騎颺至蹕蹕踣仆者鱗疊巨斧奮斫橫屍山委軍聲大震兀朮號覓辟易數舍退赤山執民爲鄉導由南壁入兩太尉猶力護西隅以寡制衆戰久力疲遂遇害鄉民具馬革駢瘞近郊今錢塘門外紫雲洞之右同立祀於死所今錢塘門側是也血食一境已踰百禩時賽祭翕集居者蒙其祐病者禱而瘳無疫癘無歲災

淳祐十年賜廟額曰靈衛景

定二年洪安撫燾爲請封爵詔侯二神曰忠佐忠

四
卷一
三
佑咸淳二年漕使又以士民之請上於朝乃封朱

令爲顯忠侯

宋理宗封顯忠侯勅神生爲烈士歿爲明靈宜也矧曰死於王事可不表

而出之建炎初金寇犯杭汝時宰錢塘鳩民兵邀擊之設奇疑敵民得逃死身中流矢猶能扶傷尾襲奮勇直前竟以戰歿功烈如此而爵命未加非闕典與民不能忘合辭請於部使者遂徹予聞深用嘉歎肇錫侯封仍賁顯號以旌爾尊主庇民之功四年安撫潛說友改建

廟設蹕中坐而坐勝威於東西廡成化杭州府志

洪武四年正祀典禮部定擬三人禦敵而死以死

勤事皆宜在祀典擬稱宋錢塘令朱公之神以金

祝配稱宋尉曹將金公祜公之神祭日每歲七月

初一日萬曆杭州府志宣德元年清軍御史吳訥

重修弘治十二年鎮守太監麥秀巡按御史鄧璋

清軍御史任文獻令錢塘知縣胡道重建提學副

使趙寬爲記

趙寬重建靈衛廟碑記忘身禦難志士所以成仁酬功顯忠國家所以立

政至於位卑力微欲障橫潰用一命之殞全萬民之生事之難爲者也興廢起墜鼓舞作興彰往事於寢微激清風於末俗知政事之先務者也惟昔宋室不競金人俶擾完顏之寇直闖臨安事出倉卒人無固計守臣棄城而鼠竄敵兵乘勝而獸突林林赤子阡危塗炭錢塘令朱公蹕慷慨士也閔元元之無辜憤封豕之肆毒志激氣揚奮焉揮戈鳩疲茶之鄉民衝兇威以赴鬪肉投餒虎蓋所不惜於是公之屬尉曹將金公勝祝公威咸負勇烈實同心膂編竹葛嶺則羣醜大踣當關西隅則萬

夫莫踰雖以眾寡不敵相繼傾殞然閭閻遁逃咸
得爭脫蒼生獲全奚翅萬計三君子者誠所謂以
一身而易一邦之人者也夫狼暉之馳秦義則義
矣而無益於民諸葛瞻之陷陳忠則忠矣而無濟
於事視三君子何如也且人孰不愛其身持赤手
而拒猛獸孰不知必害於其身然卒不顧精神之
所運用肝膽之所蘊蓄殆將徹星辰而鑠金石夷
泰華而隘滄溟者也况乎爵祿不登於廟堂聲譽
不流於搢紳平時泯泯無異庸俗一旦遭遇變故
磊磊落落傑出一世之上挺立千仞之表豈非天
地至大至剛之氣而孔子所謂志士仁人也哉故
在當時陳安之歌興哀於隴上巡遠之廟食報於
睢陽歲時伏臘牲幣交集非過也宜也廟在錢塘
門外淳祐十年賜額靈衛元及國朝祀事不絕歷
歲既久祠廢不治鎮守太監麥公巡按御史鄧公
任公咸奉帝命康濟一方感陳跡於延攬欽仰止
於流風懼無以安神靈激民福思欲撤而新之於
是錢塘令胡道以營建爲已任聚財用儲餼糧度

地勢計工役仍廟舊墟基益厚以崇宇益廣以高
有臺有廊有門翼然齋宿庖宰之所畢具經始於
弘治己未九月畢工於明年二月費不出官帑事
不傷民力可謂能且勞矣落成之日士民父老奔
走萃集瞻望咨嗟咸曰三君子勛德在吾鄉炳炳
如此其忠謀壯節瑰偉雄邁足以激懦礪鈍如此
國家載在祀典所以旌而報之者如此鎮巡藩臬
郡縣爲民父母導我禮義立則制範不言之教又
如此我民其可忘我民其可不知勸因踴躍再拜
而退鎮巡諸公聞而嘉之恐湮沒弗傳命寬述其
事刻諸石用昭示於無窮歲祀靈衛廟祝文惟神
官不必高而得以歿受乎顯封祿不必厚而得以
廟享於無窮惟能舍生以取義故人孰不仰慕乎
高風嗚呼當時之事誰識其忠於斯一時惟覩三
公某等忝牧茲土祀事是崇牲醴旣
潔粢盛旣豐神其來格以鑒我衷

錢塘縣志嘉

靖間邑人吳鼎縣令王鈺屢修萬曆初縣令姜召

增建後殿三十四年令聶心湯議加春秋二祭其
後因之

馬塍廟

在錢塘門北溜水橋

錢塘縣志舊祀宋馬雄馬武世

傳二人東西居共爲田園之塍故名屠隆廟記云
宋乾德間僧雪巖建歲豐禪院治平中改寶覺豐
樂寺後燬僅存雄武二王祠槩而名之曰馬塍廟
以奉土穀香火

顯功廟

在大石佛西

咸淳臨安志神姓岳名琚家於霍

山爲臨安府吏建炎間金人犯境神輸家財募勇

士三百人推錢塘尉曹十將爲首領迎敵死戰闔

境以安里人懷其功卽四聖延祥觀祠事之號寶

稷山王咸淳四年旨賜廟顯功侯以忠翊

宋理宗封忠翊

侯勅朕惟六飛南渡舉百二山河無一人敵王所
愾爾神克奮孤忠輸募死士得二將率眾三百卒
奪金人南下之盛氣而一境賴以安存今經百有
餘年二將已都顯號而神獨無以旌其靈可乎哉
進錫通侯宜在錢塘縣志寶稷山卽巨石山明紳
以勞定國之典

士凌登名錢養庶等有祭巨石山神文刻石廟側

傅齡文顯功廟詩宋室危南渡空城守禦稀忘生
知轉鬪忍死出重圍將帥多茅土褒封失布衣淒
涼靈衛廟吹
淚上旌旗

褒忠祠

在瑪瑙寺左

錢塘縣志明正統時監察御史夏

誠隨駕北狩殉土木之難舊有像附揚清祠

國朝康熙五十六年有司以揚清非安神之所裔孫夏

時登新建移像專祠錢塘知縣魏嶢顏其額曰褒

忠春秋致祭

洪忠宣公祠

在葛嶺下

錢塘縣志祀洪忠宣公皓皓建

炎初使金不屈十五年放歸賜第西湖葛嶺後遂

建祠焉

宋史洪皓傳洪皓字光弼鄱陽人爲大金通問使至雲中黏罕迫使仕劉豫皓曰萬

里銜命不得奉兩宮南歸恨不能殲逆豫忍事之耶黏罕怒將殺之旁一卒喈曰此忠臣也目止劒

士爲之跪請得流遞冷山方二帝遷居五國城皓
密遣人奏書以桃梨粟麪獻二帝始知帝卽位皓
聞祐陵訃北面泣血旦夕臨紹興十年因謀者趙
德書機事數萬言藏故絮中歸達於帝言順昌之
役金人震懼奪晚燕山珍寶盡徙以北意欲捐燕
以南棄之王師急還自失機會今再舉尙可十一
年又求得太后書遣李徽持歸是冬又密奏書曰
金已厭兵勢不能久異時以婦女隨軍今不敢也
若和議未決不若乘勢進擊再造一反掌爾又言
胡銓封事此或有之金人知國中有人益懼張丞
相名動異域惜置之散地又問李綱趙鼎安否獻
六朝御容徽宗御書畫其後梓宮及太后歸音皓
皆先報金主以生子大赦許使人還鄉皓與張邵
朱弁在遣中自建炎己酉出使至是還留北中凡
十五年皓旣對退見秦檜語連日不止謂張和公
金人所憚乃不得用錢塘暫居而景靈宮太廟皆
極土木之華豈非示無中原意乎檜不懌侍御史
李文會劾皓不省母出知饒州明州大水官白

鐐宣言燮理乖戾洪尚書名聞天下胡不用檜聞之愈怒繫鐐大理獄尋流嶺表罷皓提舉江州太平觀言者猶謂皓睥睨鈞衡除饒州通判又安置英州居九年始復朝奉郎徙袁州至南雄卒後一日檜理宗時改爲墳寺元末燬明嘉靖中總督胡宗憲卽故址重建尋圯

國朝雍正九年總督

臣

李衛重建題曰忠良濟美並書

一聯云身竄冷山萬死持回蘇武節魂依葛嶺數

椽隣近鄂王墳

吞金祠

在葛嶺下

錢塘縣志祀吳錫妻戴烈婦錫嬰瘞

疾三載疾革婦請先死及卒以首觸棺血流被面

其母慰之烈婦曰女從嚴命以身適人義惟從一
不能兩全舅復止之烈婦曰翁有叔可奉事未亡
人年少無所出宜從夫地下况旣以死許義難食
言遂拜別尊屬凡可以求死者無不爲之以環伺
不獲最後屑金簪并壞瑪瑙器吞之嘔碧血數升
死里紳士上其事請旌復建祠顏曰吞金

李文襄祠

在葛嶺下

祀故文華殿大學士謚文襄前浙

江總督李之芳雍正八年總督

臣

李衛改建

張玉書大

學士李之芳墓誌號鄴園山東武定州人順治丁
亥進士授金華府推官擢御史康熙初視兩浙鹽

課十二年以兵部侍郎總督浙江十三年三月閩
逆告變之芳檄諸路將士分守要害遣副將王廷
梅等力禦仙霞關五月自杭趨衢州七月賊軍數
萬攻衢之芳以大義激勵將士進擊於坑西鼓勇
直入一可當百賊遂却時賊黨猶熾溫處金嚴各
屬煽亂之芳以計招降偽將韓斌王得功生擒賊
渠汪磐繆國英等十五年夏進攻三衢偽將馬九
玉等抗拒河西大溪灘之芳間道襲擊賊首尾受
敵遂克復江山縣馬九玉繞道奪仙霞關之芳據
關口夾擊之賊將金應虎等迎降大師遂入閩踰
年浙東悉定捷聞進兵部尙書之芳念賊平之後
當急行蠲恤疏請豁金衢嚴溫處五府十六年以
前額賦又設糜於通衢賑往來飢民一百二十萬
有奇流移盡復二十一年冬入爲兵部尙書三十
三年進文華殿大學士兼吏部尙書卒謚文襄李
衛李文襄祠碑記故相國文襄李公初筮仕爲司
李於浙旣擢御史視鹺於浙晉少司馬又開闢於
浙豐功駿烈涵濡茲土而最鉅者尤在肅清閩逆